

戚少保年譜耆編

戚少保年譜耆編卷之九

間嗣祚國彙纂

緄嗣昌國集錄

廩嗣報國詳訂

庠嗣興國叅較

隆慶四年庚午家嚴四十三歲

春二月

總督譚公爲秋防事竣敵臺功大數多上疏略云
邊境百年之利與一戰之捷一守之固萬不相侔
試以臺工言之廣一十二丈有至十五六丈止者

月公傳全言
高連望樓四丈有奇有高五丈者下以方石實砌
上用磚壘周圍牆垣計四尺五寸有厚至九尺者
工費原議五十兩後經臣等量增八九十至百兩
實民間三四百金不能成者初頗以慮始爲難幸
文武諸臣百計圖成故春秋兩防且修且守完至
四百七十二座皆總兵戚某實心任事竭力督程
宜特加優異疏上部覆欽賞銀二十兩

議處撥馬

薊鎮各路撥馬爲傳報軍情設也或隔十里五里
派軍四名或五六名各帶壯馬頃刻馳遞無事則

牧養休息奈法久弊生擅索濫騎倒死甚多撥軍
逃匿至緊急公文反致稽悞合準宣大事例擅騎
者罰馬充撥其千百總以有無拏獲強詐論功錄
用庶撥困得甦而緩急有賴矣

一馬撥二十里爲一塘設馬六匹二塘計四十里
爲一舍立一舍長三塘計六十里爲一程立一程
長兩程一百二十里爲一封立一百總兩封計二
百四十里立一把總計一鎮之撥立一千總

一差人係走報尖夜等項應撥馬飛報每一牌票
不過二人差人將牌交把百總把百總付以便票

馬軍認把百總便票應付

一每撥舍長先將把百總票式給與一張票到對同卽係真正如對不同卽係假詐

一各把百總照式置便票板一葉每公文到彼卽粘票一張於公文上撥馬軍認票給馬施行

一千總把總各置簿一扇凡差人公文經過不論雨夜卽驗記轉發不許時刻稽遲

一馬撥止傳報緊急軍情及差調兵馬夜不收與有警入口尖哨之用若非軍機不許應付如或程舍長擅給則百總覺查百總擅給則千總覺查卽

一面飛報本府拿治如失覺查一體究治

設築龍井重險

議云原勘移出邊險自鑽天峯分水嶺等十三口
乃馬蘭路所屬寬佃西尖山起至松棚羅文廖家
寨止在馬蘭則係寬大二提在松棚止係羅文二
提其三提共守之地所以防阻自西來東徑入馬
蘭一路賊入馬蘭方得循邊東下至洪山龍井澈
河一川又在龍井關上非所議十三處之地原議
包羅馬松二路實未將二路包羅無遺也今以長
城橫言之松棚東界盡灤河西崖起以防東來之

賊萬山中僅有此嶺屬夷討賞由此而入單騎行
十里方過嶺又單行五里方入平川卽東常谷再
入來路爲西常谷過此直至龍井澈達子溝計邊
三十里龍井關有澈河川復向北遠路遠不得到
羅文大安間必由牆下小川順牆亦只在羅文等
處此乃自東及西之路與廖家寨不接查得該地
東西常谷該築臺四座長城嶺用臺三座中間頗
大且運料口外亦有四座另已行東西常谷各辦
料候完設法軍士萬數一齊搬築旬月可完將火
器守禦之具一擁而入仍以該關各軍查派防守

屬夷聽其往來則東西之路鎖鑰有嚴防矣

清解額軍

薊鎮今日之急惟補軍爲至要補軍之術在軍衛有司兩相查比而衛所之官勢不能行須首領流官與衛所官協同勾攝遇比之期同印官按季赴鎮考較庶事有責成而軍無隱漏期於營伍庶有裨益也

呈築鷄林山牆

邊固藉臺爲守臺仍附牆爲固鷄林八臺雖具若不加牆則八臺之勞置於何地仍於牆下削偏坡

開溝塹與捐馬賺窖架木品坑從宜布設以期悠久庶邊境有金湯地方無烽燹之虞矣

查覈軍器

戰守之具莫先利器標路兵軍器械多常操借用或交代侵漁一遇調遣倉皇無備輒行請給今立定格件數不足者補全造冊送督撫本鎮每防本鎮照冊查驗一次每季本將查點一次每月本千把總查點一次下班之期委官查交缺者本軍賠償仍以軍法重治上班之日照冊查點缺者經收委員賠補如此庶軍器不至糜費而緩急有濟矣

議拏作歹夷人

照得犬羊無義惟利是圖各夷每於既賞歸巢之時順便拏人帶回殊爲奸侮今仰副叅遊各差的當人赴喜峯探聽遇叩關討賞之日嚴爲收斂防備仍詢該關何時賞畢各夷何時起身卽整棚兵馬於邊外總括道路扎候一面接礮暗哨果有拏人消息卽出口追剿務奪回被拏之人其作歹之夷賊斬功級解報定行賞賚庶軍聲有奪人之威而虜歸無肆侵之念矣

給邊外戍守行糧

長城嶺臺四座孤懸邊外且屬夷不時往來尤宜
密守今於正中臺設一把總各臺一百總以明臂
指相使之義分班遠出哨探以定首尾應援之機
又必倍守卒以舒人力嚴號令以警士心聯絡烽
火通達內地以便應援仍將撥發官軍及器械薪
水等項定擬規則但南兵遠來向議以三屯爲老
家凡出戍外與本營軍士一例分別百里內外全
支半支行糧今嶺去邊二十里餘雖非百里之外
自與內地不同而孤處懸邊百凡艱阻且地當徼
外無米可糴各兵日用不足合無憐其遠隔准其

全支行糧以資用度以安遠人之心

議將官交代

略云軍情馬匹爲最而機務亦以馬政爲先國家一馬費民間百金及散之行伍飼養不時強半饑疲倒死夫本冀攘外以安內乃徒敝民而填壑其致此者以將官交代之際無一定之章程莫可稽考耳合無以百匹爲准倒十五匹者提問降級蓋軍馬器械乃疆場防禦之至計國家安攘之大機況任代一體凡更代之日將任內軍機數目錢糧器械造冊呈報總督等衙門查明無礙方許交代

更題請勅下部議載入邦政永爲本鎮定規則官
有所懲馬匹不至日尪而邊計或裨萬一矣

呈覆薊鎮條陳尖哨事宜

一尖哨深入虜營無非欲得虜之消息而時日久
近以虜情爲遲速務在預偵當虜勢已動馳報須
先虜數日入口後至者以軍法重究其未及哨所
或爲虜縛亦不能無如今春所探本爲辛愛聞各
役徑入辛愛營與彼面見卽取其辭以爲情實萬
一執畱或因而殺之在我安心待報在彼突然而
來不可不慮也惟有多差廣探卽被執之人我無

不知各役須當散處凡遇變知風卽便騰山傳報
有失亦必有得也但暗哨之人不許與明哨相約
使各自爲哨在內則多方設備如虜在前不可恃
有哨探疎於防守則萬無一失矣

一選尖哨必其慣習虜情能夷言而熟識夷人者
如積年能事之徒卽無身家不得遺棄大約嚴加
精選取具連名結狀不堪者連及將官

一哨夜出口必費賞物兩無對証其侵漁之弊或
不能免惟事期有濟勿問出入可也尖夜銀每路
已發到百兩先以其半買物聽軍門撫院本鎮緊

急差人出口之用其可以從容備者不許槩用以
致臨時缺乏稽遲出口者罪坐本提

一蒞之積弊事急則懸賞萬金功成則百方媒孽
無非各賞意遂使掩功爲罪不止騙誘屬夷無信
已也昔年把都兒議河坊伯彥得信冒雨入報始
得堵退及事定止賞銀五兩曲突徙薪恩澤何在
爲今之計不可恃有此輩遂緩我備亦不可恃我
有備遂疎此輩有備無患事權在我不過假此添
一層藩籬耳近聞撫賞濫惡未免怨咨以後屬夷
報信成功一體陞賞併入敘功疏內其各夷行喜

峯大關差人喚集受賞仍行各叅提照常夷數准
賞不許增加一名其賞物將官親自當關驗閱或
有冒濫併賞物不堪將官是罪

一各路尖夜五十有奇率皆壯健倍食於軍相窺
通行編伍操練該路甚少者量行增添每路分春
秋兩班春防以秋班操練春班者出口明哨暗哨
架礮與秋防互換每防三月仍聽本鎮差官同該
路操練遇警先守本路聽叅遊提調如賊團聚沿
邊追賊而來聽本鎮調用

重哨報屬夷

薊鎮之防守有報爲真寄耳目於屬夷委腹心於
偵探蓋緣黠虜舉動必屬夷交構始得其情偵探
消息以屬夷向背分真僞而所以激賞統領官員
者欲其鼓舞哨役激賞哨役者欲其結納屬夷況
犬羊之性惟利是圖必啖以說心之餌方効其搖
尾之誠則屬夷賞罰應照尖夜等第分別犒賞行
喜峯關口遇本夷叩關之日曉諭錄其傳報送哨
之功聽於額外請定資格分別仍設法譯諭使皆
慕義効順向化輸誠則動靜先知亦伐謀之一策
也

官兵互結

各路主客應援兵酌量多寡分析已定立爲主副將領平居練習有警合營隨賊而往將官保中軍中軍千把百總旗隊總以至隊兵以次挨保並無臨陣不堪者取結在卷責成自上而下之法也其自下而上亦申明連坐務臨陣齊心隊軍保隊總隊總而上旗總百把千總中軍遡而將領各本路相保家丁雜流亦然有臨陣退縮失陷本官者償命俱取具軍令結狀附卷

重操練

列寨臺垣並建百世金湯之固也而路將之闕冗者怠於修築流言修妨於練蓋邊將故習往往以操練爲故事苟且偷安以粉飾架虛爲奇計視戰勝守固爲虛設以苟圖僥倖爲當然至有銃不知然礮不能發者甚至銃眼塞而不通弓矢設而無用火藥雜以煤炭大小圓石雖備止包皮而數不足者乃於是秋罷工行綜申飭將領邊防之事修練並重戰守交資臺工遲悞猶可徐圖練習少差誤事非小各路宜遵所發號令常充操練如有仍前虛應故事不如法者副將以下軍法從事

議處主軍倉庾

略云邊關軍伍苦楚百端做工則身親土木之勞
差使則兼充夫馬之役倒死馬匹則有公攤椿朋
之徵撫賞屬夷則有買辦供需之費名爲採柴買
易實則扣除月糧抵補此數十年所釐禁而勢不
能已者夫軍士之仰藉月糧凡父母妻子之養饔
飧衣食之資咸需之卽不必論其啼饑號寒而甘
心縊刎接踵溝壑誰爲憐念設令月支之米俱得
實數卽盡充公費不出私賄猶之可也夫何甫出
倉門已去其半半猶不足而致索用於私囊且關

支之處皆內地州縣倉廩或七八十里或百里或
二百里欲通行赴領則關塞空虛往往坐此失事
如遇兩防之日邊報一急各軍晝夜守瞭誰敢棄
之勢不得不於二三十名內撥一人兼支而駄運
煩難散給不便不得糶價而倉粟多陳一時不能
盡售又不得不賣與攬頭其時買者少賣者多把
持勒價各軍又以期限無多每石纔可得銀三錢
夫朝廷費銀一兩買糧一石軍士止得三錢夫既
歛膏脂於民而軍復不沾實惠良可痛惜若攬頭
買此倉粟又復上倉陳陳相因至於不可炊食此

尤宿弊欲革倉弊須使陳米得散今姑准以八十里關支仍舊凡九十里以上或移食就地或移粟就軍或照依給商之數給軍以銀每石七八錢或九錢令其自買蓋主軍皆久著非若客兵收買不便也凡此皆憐其貧苦因情立政務在便軍不特爲節省之一端亦裕國之長計也

夏四月出塞

是月單騎闢險出塞行二十里外而山抱水潏鳥鳴魚泳有江南意憶昔詩兩首云鬱蔥千里綠陰肥澗水縈紆一徑微魚未驚鉤聞鼓出鳥因幽谷

傍人飛江南塞北春相似并郡桑乾總未歸惆悵
十年成底事獨將羸馬立斜暉石壁凌虛萬木齊
依稀疑是武陵溪長城舊飲紛胡騎大漠初驚過
漠磬國士死來金已盡邊機愁絕劍空攜天山聞
說尤佳勝欲乞君恩試馬蹄

登捨身臺

臺在邊牆絕頂魚貫而進日昃餒甚入山買胡餅
啖之感而賦云向來曾作捨身歌今日登臺意若
何指點封疆餘獨感蕭疎髣髴爲誰脩劍分胡餅
從人後手掬流泉已自多回首朱門歌舞地尊前

列鼎問調和斷崖垂綆幾憑虛却笑山猿技不如
古戍春殘初見雁故園愁絕冷看魚百年俯仰羞
巾幘五尺涓埃畏簡書沙磧傳嬾君莫嘆邊臣應
得戒衣襦

阻夷婦嬖只討賞

各關撫賞例有定額定地乃嬖只等擅越信地妄
起釁端恣其無厭之求若不痛絕何以遏阻夷情
合差暢曉邊務夷情通夜於各關宣諭多夷各照
關寨照例請討如再執迷定將大關額賞通行革
去仍仰仗本院威重齎文喜峯著落楊秉忠差人

多方曉諭使知法禁以杜妄求而犬羊庶不恣慾
於無厭矣

呈給馬匹騎征

禦虜以馬爲先今大衛之兵日見減汰必用主兵
以搜鋒伏念主兵爲前奮之夫戰馬爲至急之務
將本鎮各路主軍內除家丁雜流塘撥尖夜等如
石門馬太援兵之馬各足二部燕臺松牆古北援
兵之馬各足一部曹家一路雖至小援兵之馬亦
足一司庶堂堂之勢可期一舉矣乞題請照數給
發以壯軍容則邊方之幸且戰守之資也及今不

早爲區處將來客馬漸減主馬無多誠不知計之所出矣

呈恤遠戍操軍

山海去牆子嶺相距七百餘里戍守雖在牆子籍伍尙在山海各軍終身戍守卒歲二役與兩防暫調者不同合照主軍出百里外修守例每日准支行糧一升有半仍免雜差止操練守瞭一面處與營房居住俟三年外住居已定棲止有常卽行住支則赴戍實丁不致苦逼逃竄而行伍從此可定矣

簡選奇兵

欲養奇兵非挑選不得欲用於口之內外非尖夜
中選集不能各路之兵既遠本鎮將教演之兵發
回傳教與發過尖夜應該抵補則挑選赴鎮者乃
取其所有而解發清勾之軍又先後抵補亦非強
其所無不過衰多益寡之中寓因形用權之術與
之兌換而已其前項精銳聚之鎮標姑以秋防教
演俟精熟機宜仍發本路傳教衆兵統率行陣候
虜有人犯消息方行調集在各路止摘一二精銳
之尤在鎮標實得五百死刀之士投間抵隙何所

不可

議覆提調家丁

查得四十三年題准叅副招家丁一百五十名守
提招一百名在卷今薊鎮以屬夷爲鄰日久驅馳
撫賞之事端於提調往來交涉之間固當示以威
武而防守之際尤宜重以兵權蓋職司地方典守
非輕而虜之窺伺多方溪壑難厭且多別生事端
况守提之軍又單弱之甚壯者調用團練委家而
不得守弱者力役樵採供辦而不得休養無捍禦
出力之人何以振揚威武合無以五十名爲率例

給家丁銀一兩二錢月糧一石自行招募精壯之人就於本關寨頂補活缺隱漏正軍亦不許將見軍濫收改名冒頂益致關寨空虛每至十名開具年貌解兵道驗試允收仍加作養訓練無事時常操演隨本官擺列隊伍以壯軍容有作歹夷人及零騎往來提拏邀截每防仍聽本職與援兵一體操閱遇警與主兵一體調遣而家丁之馳驟截殺尤資於馬無馬是無軍也各提通用馬一千三百匹乞題請於大僕寺發馬如數給丁騎征則事事有備而兵減益壯於邊徼在在可守而屬夷稍斂

於跳梁矣

議保河民兵四事

保河入衛之兵支費既厚倚賴亦專而乃徒事虛文守練之法不舉委靡積弊日深日痼所亟當釐正者四事煩爲裁議通行一議馬匹原設該營馬一千匹每年一兵連工食給銀二十兩聽其自買赴邊並不印烙屢以羸弱癘瞎充數不堪實用況該營既分撥三屯車營而車兵專以推挽爲用且軍器重大非騾不勝合將該營准存馬五百匹選壯丁五百人充馬兵班回之日各縣督監另易強

壯好馬印烙該道仍將毛色齒歲并兵名造冊解
赴軍門一留存照一發本鎮稽考如有從前抵換
將工食草料扣還懲戒再買騾五百匹抵馬馱軍
火器具其買騾之法一如買馬則錢糧不致虛靡
而戰守可期固勝矣一議更替民兵隨車營訓練
其號令機宜與統兵之法所費火藥賞犒已爲不
貲卽一人練熟而已百倍其功奈何放班之日任
從更換及上班復行教練設有警報何以禦敵合
無於掣放時嚴加選定堪者給與腰牌印記懸帶
本營造冊一本存留照驗每上班之日該道驗發

逐名查對正身方許赴邊仍遣押送官吏親解軍門查驗其不堪者發回更換仍於秋防解邊填給腰牌庶教練有益而兵馬日精明矣一議工食各兵工食每防解邊貯密雲縣請詳軍門支領正恐各兵支銀在手輒思逃竄及僱人代替誠善法也夫何日久弊生密雲縣既無額數可查軍門查考又不及於此故各縣奸蠹吏書同狡兵將解邊銀自行私領合無於赴防之日責令各將銀解赴本部院查驗明實仍掛號發密雲縣收貯聽該管遊擊造冊支給逃故者截日開除遲緩過期嚴提究

問庶士飽馬騰而軍容斯壯麗矣一議防期戰守之法非教不精該營係創立民兵所養頗厚宜當効力之人今屬戰車之兵其馳騁之法尤宜素嫻今春班定以二月初一日秋防定以八月初一日到合行易州天津二道嚴督各縣如期前來後期者責該官吏則兵士蚤集而緩急斯有賴矣

六月召諸路將盟灤上諭以邊事利弊及禦虜方略
勝算

時惟庚午夏六月諸邊新臺肇建過半當亟明守禦之策乃奉制撫題允暫停工役以舉練事隨於

六月下浣檄集東西兩協守及三標各路副叅遊
守諸將領具會於鎮城庭謁後揖入於止止堂分
左右列坐時天暑出吳扇分賜剖瓜而食有頃家
嚴謂諸將曰諸君以今日共坐之處是何處耶衆
莫知所對曰此非三間清署乃是一隻漏船當風
波中若得睡則睡得坐則坐仇人反目各不同心
忽將船被風浪飄衝致碎彼時無分賢愚無分恩
仇都是溺死此際便是異心仇人旣在一船說不
得不相識說不得平日仇怨須是同心同力將此
船撐過江海到上岸時任從衆人各心各路分搜

而去今要求漏船過得風浪卻人人不齊心不共
拌一箇死命那箇能免得去況諸君起於世豢者
受國恩有年崛起布衣者亦榮耀逾分以職事言
分當捨身以國法言勢當捨身姑置勿論且以薊
邊已錮之習與將士相沿之弊爲諸君論之可乎
夫九邊同爲防虜獨薊事與各邊不同比如宣大
山陝無屬夷隔斷且地平無險可據胡馬入犯無
時數千亦入數百亦入甚至數十亦入將官隨有
警報便就出去追剿緩急之際迅雷不及掩耳那
得齊兵那得聚衆故恃有家丁之設所謂在精不

在多又有偷馬劫帳房之類平日邊徼得此功勞以爲根基及遇大虜卻稱衆寡不敵卽厚顏無恥尙可保全身家薊鎮切近京師議論煩多山川糾繆有險可守外有屬夷限隔無零賊敢入三五年方一犯每犯必東西兩虜合勢而來動稱十數萬邊外延長百餘里或以頭爲尾以尾爲頭分攻聚突必有一處潰入入則又以精兵剗營自固虜知勤王之師不日輻輳自入至出多不過十日此薊鎮之形也臨大舉時便稱衆寡不敵惟以家丁數百窺伺零虜卽殺數級豈能掩罪甚至無零可剿

如何不講戰夫諸君所以不講戰者病在理欲不並立實事與虛套不同行因有虛套行得慣故不講戰諸君多係西將率以家丁爲利器決不可以此視薊鎮也家丁之召本爲軍士氣弱散守地方倏然零賊入犯一時軍士呼集不前而將官當鋒必得親養恩深之人相救相護今諸將每人統兵一枝二三千不等將此二三千衆教練精強又召家丁二三百厚養以充先鋒今卻顧此遺彼愛小失大就以軍士之馬供家丁騎乘以軍士之身供家丁役使以軍士之糧作家丁養贍是得二三百

人之心盡失部下二三千軍之心以有用之軍置之不用之地是費朝廷二三千軍士之糧餉而僅得二三百家丁之力本爲求精適致冗費本爲求多反爲致寡旣視二三千爲冗數又視之爲必不可練用如是而廝役益多益快其欲諸將又且利於此習於此偷馬打帳房得功視此爲制夷之長策及至大舉而入便謂虜必不可交鋒必不可堂堂相對凡能神出鬼沒偷竊零騎挑壕自固便是好漢此牢不可破之習也其在薊鎮將士又以大虜每犯無敵積威所劫亦謂決不可論戰今且以

利害爲諸君告之賊若進入內地自入至山必然
要堂堂正正血戰一場必有數千真正功級方可
塞責若不及此決是大家棄了身命死於戰場以
報國恩諸君就要偷生本鎮決無生回之理況我
所定援兵俱係三分中選二又以一分臨時聽將
官自備沿途疲乏補數不到賊所必尋主將箇箇
軍定要於正行之間設法見數彼時所到不齊復
有何說又往日因無行伍因無分辨某營因無左
右前後營陣故到箇地方任諸將各擇便地各自
爲家以故對面視其危亡而不救甚至坑陷主將

而不顧今以十路分東西各五路主客援兵務要
分一營每營有定就方色旗號一箇人亂不得一
尺好地形揀不得又若某營前進奮勇本營旗號
一色不待本營報來便知是某將軍馬若一齊退
走了但望一片某色旗便知是某將先走又上陣
之時本鎮當中諸將人各爲一頭將官家丁在前
軍士雁行於左右俱看本鎮高招但有退縮者只
將將官預令旗牌伺候徑聽綁來只是一馬馱送
車營督撫所在之處任你如何辨解就著同營一
將代管其衆所以每援兵一枝必設主客將官二

三員正爲臨時拿了一個就有一箇代替再說不得臨敵易將的話了至於部下軍士向來未見賊後一行查究以此衆不用命本鎮今奉勅諭自副總兵以下抗違練兵便聽以軍法處治況臨陣乎我必先於練兵時一試之大都今日只是要轉移念頭改箇肚腸最爲要緊諸將唯唯已乃謂曰不獨望諸君信我而改圖還要部曲信諸君而改圖不獨部曲信諸君而改圖還要士卒信部曲而改圖致此之效不獨我諄諄告諸君還要諸君以此諄諄告部曲部曲以此諄諄告士卒使上下同心

人人知此箇箇改圖必須數萬人聯異爲同聚少成多合寡爲衆方爲勝算諸將默然復謂曰無已還有一著頗省力諸將復請則謂曰薊鎮山川險阻守固最易若能守於牆上拒打賊回見有明例各升世襲三級今奉明旨肇建空心敵臺各騎牆相映軍士據臺爲守正面可禦山梁擁衆之虜兩面可打折牆之賊便是虜馬得向臺空折牆而入兩臺上暗認首首數銃齊發縱安灘把都兒土蠻辛愛等皆死於我空心臺銃石之下未可知也然欲致此之效必在練有節制使貴賤尊卑上下相

維十人便有一隊長十人視隊長便畏如大將如此處處是有制之伍高山僻嶺儼如主將在上故人方用命所謂戰要練守亦要練戰勝之軍未有守不固者況今臺座俱當馬衝堞上之軍皆臺上官目親臨屈指可計某軍有功某軍先走便可執簿而書山下各路又設有遊兵專拿逃回先走之徒苟能守固所謂全軍爲上不戰而屈人兵爲第一著爲最上策也諸將於是始有以守禦方略請者有以戰車方略請者有以器具請者有以哨守請者雖言人人殊要知皆爲守戰實事乃隨問隨

答講論再三各歸於守固戰勝使諸將曉然而後
已時有言士卒之苦者乃謂曰主兵月糧客兵行
糧此國朝兵食定制無敢議但在諸將隨事撫恤
節省水鎮舊所炊薪皆派於近路諸軍今已之乃
自遣家丁採用其他類此者多軍士雖不蒙惠亦
盡吾心而已諸將曰如退匠役以歸伍減隨從以
充戰革薪炭以蘇軍諸將尺帛不敢及門此兵主
所以恤士也諸將雖不敏近日改弦易轍者多矣
但如月糧關給於二百里外撫賞官帑十不及一
軍士每月身既修守復督採柴變價以充撫夷之

用且採柴惟二三處可貨深山窮谷孤塞寒村卽有柴莫售雖設有採柴之名實扣月糧以充他如差使應付之繁難委吏之摧挫不可枚舉乃謂曰守邊將士之苦恐諸將言尙未盡恐一時未能盡除吾且盡吾心且以教練守戰爲圖我若做得效堂堂正正殺賊一場盡得職分上項苦事本鎮保爲諸將士轉移之凡吾所以諄諄千言萬語無非要諸君改念拌捨一身實圖一戰此正所以爲諸君與軍士求生耳兵法云必死則生幸生則死置諸亡地而後存皆此意也虜馬遠來五十步內外

無不弓箭射我我今有鳥銃快鎗火箭虎蹲礮佛
郎機皆遠過木箭狠過木箭中人多過木箭以此
五種當他箭諸君思之孰勝孰敗虜馬近身惟有
短刀長不過三尺我今有鈚棍長鎗鈎鎗大棒皆
七八尺長兵法短不接長一寸長一寸強以此五
項當他刀諸君思之孰勝孰敗虜以數萬之衆勢
如山崩河決徑突我軍我有車營車有火器終日
輪放不乏不必挑壕而馬不能度不必依城而虜
不敢前欲行則行欲止則止諸君思之孰勝孰敗
虜衆人自爲戰萬人齊力使人不得不戰就中又

伺其隙攻其情諸君思之孰勝孰敗又虜馬方來
百餘里外凡我標兵先赴信地應援之時其各標
下車營盡將鳥銃手調赴邊牆將車於近便總路
城池沿城爲衛重器還宜在車城車相恃先保無
虞若能禦拒虜回萬全之勝也萬一潰入車兵驅
回附車馬兵馳回附營各路援兵見烽火傳至不
待調遣馳赴主將合營舉衆迎敵計凡五種方略
所謂多方以誤之必有一中未有不勝是本鎮所
以決逼諸君捨身拌死之因實爲立功揚名之計
到此分際是使諸君死乎是爲諸君生乎諸將始

帖服無敢他議乃復將各路軍數取置於案諸將
輪至案側以水路實在軍數逐款詢於本將親爲
擬註先定墩臺烽火時得諸路廢弛狀有十餘里
無一墩者烽火何以接傳於是擬定墩軍授以傳
守之法再擬尖夜部伍練法分明哨暗哨架礮沿
革次定有馬援兵不派臺礮而照信地專一應援
遇急聽調次擬尖夜與幫尖夜團練部下聽調援
兵次擬派牆礮之法前軍皆有守臺牆賊入乃調
次擬路將自練步軍專守臺牆而不聽調次餘數
百以備老弱事故仍派臺礮凡係雜差調取之數

開除無遺無不樂服復定十一路援兵向往方略
乃多屬秘機不可預泄虜聞者自召諸路將集灤
上會盟六日日萬言有奇申諭竣明日於教場設
大宴諸將接於臺下序見於堂榮方行酒因舉酌
授諸將曰今日疆場大事同舟患難盡以托諸將
策効願行則公等皆麟閣凌烟之流策違願阻則
吾等皆一時覆舟之鬼願諸將勉之酒徹乃合將
士若而人大誓於武場期共變蘄習爲連合數萬
戰守多方之圖冀堂堂決勝之舉因賦詩以示諸
將云獨立懷知已多歧嘆宦情古今誰俠氣天地

一愁城萬里猶投筆千年羨請纓君俱學劍者報國有新盟

會追逃軍就吏

薊鎮軍伍非豪右爲窩藏卽勢要爲隱蔽故邊營單弱動輒乏人方今督撫鎮道竭力清補而吏典潘文始以食糧正軍貪緣充吏繼以展轉推托隱蔽軍丁於本軍則殘疾頂冒無一丁著役於別姓則指引逃亡致四戶空虛以一小吏敢爲逋逃之主若不痛加懲治何以警戒將來除已將某軍摘解燕河營頂補潘文名役外其祖軍應正軍潘文

頂當卽今在京當該合請貴院咨部請發前來著
役則奸豪有警逋逃知懼而行伍不致空虛矣
覆兵部條議八事

一議封職以臣服夷酋議者咸謂名器國家所重
蓋古人惜繁纓施之中華禮樂之邦可也若夫懷
柔夷狄又未可以是槩論今俺酋獨雄徼外我卽
咨之能禁彼之自王乎不如因其請而授之不割
土地不分人民適成中國之大卽使虜酋狡猾背
盟而名義昭然其直在我爲今之計惟當堅其始
盟要其誓信先遣才猷素著機議風生使臣二員

到彼面諭令其通集大小頭目各傾心望闕叩首
有我臣妾之義禮文尊崇儀度肅恭一面鑄造冊
印同時速遣其大小頭日照三衛例各給以勅書
一定貢額以均賞賚夷狄之性惟利是圖各夷名
位雖有高下賞例不宜太懸仍將賞物明坐本家
頭目名下以免他日虜酋併吞誤我邊事各夷應
賞數目喜峯口原有定例可稽冊內所開貢夷四
十七枝每次止許貢馬三百或五百此因治間西
虜貢例自當照行喜峯見賞事例如某枝係都督
或都指揮頭目每起該進馬幾匹內將馬一匹坐

註某都督差頭目某進馬一匹餘俱坐本家頭目
或指揮等項名字期與賞例相同可免夷人爭擾
及查禮部賞例指揮千百戶頭目皆五表裏都指
揮六表裏若都督親到京七表裏此三衛定例不
宜軒輊致起紛紜但王爵冊封賞錫之典未之前
聞自當從厚不敢妄議進京之數以少爲主餘夷
爲守邊關其還巢賞賜不拘進京留邊馬匹只照
原進數目一例給賞一議貢期貢道以便防範冊
開貢期以正月聖節爲限斯固草枯馬弱之候易
爲防範然每歲正貢一次由居庸以達京師此

治年西虜貢道無庸別議其夷使之押送途驛之
廩餼亦頗詳悉至入關之頃播揚天威震疊異類
當照喜峯事例舉行但夷使到京當新置一館另
行安插不可與三衛之夷同處其朝宴之時亦各
派日期務令不相見面以杜釁端然又不若將本
虜貢期改議於三衛出京之後俾其東西則西尤
爲上策一議互市以利華夷夫夷地不毛無耕無
織所以仰慕中華者以其日用如布帛鍋鐵針線
暨簪珥脂粉之屬不能一日不資於中國而互市
之利實羣夷至願使此利人人沾被逾於搶掠之

得彼亦何苦不安於市而必欲捨生以圖侵犯哉
蓋羈縻虜情可以長久者正市之謂也但須處商
民而號召有方務使各得其利內外同欲市方可
繼彼時議抽課稅似爲長策夫抽稅撫賞乃因其
利而利之自不容已者也一議撫賞以求可繼夫
貢市通行豈無數年之安而目前軍費似有可省
者然安不忘危治不忘戰况貢市供用驛應犒宴
諸費叢出一方之力必不能辦須戶部給發銀若
千乃克有濟今欲於各邊減哨減守以充其用夫
各邊自有各邊撫賞哨探豈可因西虜之封貢而

遂弛耶剌心肉以醫眼前之瘡萬萬不可惟於宣
大西酋貢市之處聽彼督撫減以馭夷或可從之
一議歸降以杜啟釁封貢旣成疆界自辨冊封之
後自當恪守失邊不可不復夷種不可誘收中地
被虜之人隻身來歸者應聽投納夷婦夷器馬匹
盡付虜中還卒以還須與夷酋訂約載於番文冊
勅之內不許借此叛盟一審經久以嚴邊備部科
之議必欲要其後之不變嚴其始之峻防令一遵
法制永絕背逆固守邊之經也若款所稱邊境有
數十年之安則宣大陝西殘破之城堡可以漸充

實荒蕪之屯田可以漸開耕河西延岡之大邊可
以數報完乘其無事務急自治數年後兵氣振而
邊備整縱有反側我得以蓄練之精力守可以固
戰可以勝夫朝廷不惜王爵之封萬金之賞授之
夷類不圖常安久治抑何爲也夫事急則理緩則
忽時嚴則愼安則忘此人情也卽今封貢數年之
安諒可參取但不知前數者自治之策果作何計
較施爲以爲審處之圖也第恐文武官僚循資遷
轉後先迭繼意見參商訓作之法未成移官之檄
頓至此去彼來又是一番作用爲今之計須隆其

委任厚懸恩格不拘大小官員堅執久任之議果
能處置得宜久安長治十年不移卽加以不次之
擢何也夫法之必行惟立法者能之而非常之作
用必非常人能任之一畀匪人立見敗壞則久任
責成之說封貢之先著也一戒狡飾以訓將略夫
制馭之權當悉歸督撫不許將領撓沮傾忌違者
悉聽便宜行事其間情苦者奏請改之情重者拏
問處治見不佞者論罷卽自薦同心同職之人共
事地方以終王事他日誤事與督撫同譴不惟可
以杜異議之嫌亦可免掣肘之患矣蓋原議欲行

九鎮將領務實心報國奮勇練兵戒平時驕悍之習乘今日糜廩之暇修戰具蓄精銳不致廢時失事誠爲至計但武弁不學無術宴安易卽警戒惟艱卽今地方多事明法赫然猶且偷安息惰提命不省者比比若息肩承平之後必將解體求其終日乾乾者不惟武弁鮮其人卽縉紳亦不多得也然操縱之機在上不在下倘封貢旣成遂生玩愒縉紳恬嬉以待遷將領偷惰以卒歲轉相效尤雖智者莫爲之計矣抑又慮廟堂之上廢革繁興議論之司意見百出減兵減將革餉革防一切未然

之圖桑土之戒視爲過計豈獨邊防之弛懈武弁之玩愒已哉凡此尤當深長慮也

覆政府議軍糧改折

夫改折一事有四便焉革倉弊一也蘇商累二也濟軍困三也免諸項使費以歸軍而扣餘又可以益官四也不意大司徒約分司酌議遂將四便之圖改爲節省之計果如所議軍益被其戕刻怨之所叢必有當之者矣謹據實再申言之四年春因兵備道嚴革倉弊攬頭束手以致差軍領米太多狼籍通衢無人收買城鄉士民但糴新穀食用誰

復以有用之銀而買不可炊之粟乎以此堆積旬
日無可爲計兵備道仍復喚各攬頭准買攬頭復
明白要許上倉方買每石只得價銀四錢有零極
貴之時不過五六錢夫以銀給商是何數目上倉
使費如何領出狼籍如何不得歸軍賤賣又復上
倉新陳相攙朽腐如何故不若省此數番之費折
與軍士頗爲實惠又召商一節各分司不同有召
商兼買主軍糧者有召商止買客兵糧者其召商
之弊上司吏書官攬等役均利其賄米石粗少固
不待言往日聽其情願爲商故名爲召也近年強

派於民間富室猶之可也邇日又將邊衛軍舍餘
丁家無百金之產者亦盡數徑行拘拏幫貼商人
或因民商指名告幫或因互相訐討邊寨營城稍
有家室之念者不下數年而逃竄一空矣爲今之
計除近倉百里以內照舊給本色不可改折離倉
百里以外者改給折色計以六個月以六箇月本
色而改之卻將主兵本色米兌與往來客兵支放
將客兵召商收買銀兩兌與主軍折支免其召商
耳或謂某分司商銀少而主兵米少則何如但百
里以內仍舊支本色其百里以外六箇月本色改

從折支以客兵召商銀給支無有不足如仍短少可止改四五箇月仍給一月本色亦可如此既省召商以蘇邊困殘民貧卒又免倉弊又免商漁其給支折銀之數當以商價低昂爲準蓋所奪以歸軍者原是各司給商之價且如米價時值每一石用銀八錢戶部給商必不能少八錢之下時價一兩或一兩二三錢給商必不能少一兩或一兩二三錢之下彼時每石以一錢歸官譬如給商八錢則以七錢給軍以一錢入官一兩給商以九錢給軍一錢入官若時值一兩設使官司如能止於八

錢給商則軍士孰敢逾商之外而厚望乎此原揭之意也今大司徒准分司會計要將不拘離倉遠近軍士盡將本色改折通留一二箇月折銀不照商價低昂只照已定間支折色之數每春夏止於一體六錢五分秋冬止於一體四錢五分誠如此議則彼卽支本色而復賣與攬頭上倉賤時固四五錢貴時亦有得六七錢之日何利而肯又聽其剝削哉此雖遠者亦不樂從況近倉百里以內支糧一石不過旦夕之路卽無力必得八九斗到家就值七八錢如何無故就削而援折支例哉又如

近倉同城之軍問支折色已爲苦困尙有六箇月
本色又復減折誰肯從乎不激之脫巾則逼之逃
亡而已乞望除住在本倉口城內及至百里以內
者斷然將舊本折間支本色一石折色春夏照例
六錢五分秋冬照例四錢五分不必再行更張亦
不必置之議擬間也其係去倉口百里以外者將
應支本色米兌運各邊爲客兵支費蓋屯鹽米不
拘何倉隨處可上也將商人應買價銀一照時價
低昂每石內以一錢歸官其餘盡作折色給軍其
事簡明易見但大司徒又謂依時價低昂可以作

弊此殊不然商人領價歲從豐歉軍士照商價而
又減一錢何以爲弊如謂低昂有弊則商人低昂
獨無弊乎大司徒又謂價值不定或米賤要價米
貴要米如何處之此更不然軍士之心惟於便益
處指望米貴時價高給商亦高米賤時價少給商
亦少是軍士不論米貴賤皆得實價又何必支米
而狼戾於中途乎大都部中通議只是因此便軍
之情而必欲爲節省之計不欲奪商之漁以歸軍
而並奪其軍商之利以歸官此外再無他意嗟乎
今日之軍以本色言之斗斛旣小米豆粗惡朽腐

相半只計得好米五六斗之數以折價言春止六錢五分秋止四錢五分料豆止二錢五分亦只得五斗之實只以一石爲名色耳支處到手營路有差使當月之歛有上司吏書之歛有陪馬之朋有撫夷柴價之費更有不貲一月之銀僅得一二錢銀到手一月之米僅得一二斗以食妻孥以職愚昧千方百計於不得已中思得商人一綫之利可以稍濟千百攢身之軍今又爲節省所奪誠恐如前言非致脫巾之虞必益逃竄之路夫大司徒梓里所在似非軫念邊隱之善策也職極知觸冒忌

諱然此實當以死爭者故越分具陳

復科議減免人衛之兵

略云固守之術因地稱人因人稱食如不論地之長短緩急惟以食之不足去兵以就食將以何爲守也且謂邊臣不練土著希畱人衛精強若將以主兵旣強則人衛之兵可掣而實未究其故耳蒞之畱客爲邊牆遼闊長二千里內除山巖絕險不必守者其中斷續不一有水口可通零賊之處其墩臺瞭望勢不可無尙有六七百里通單人單馬者雖不必特設重兵亦須列堞乘城以防衝突通

計沿邊險隘約堞二三十萬軍數不足不得已而
借畱衛兵況虜聚而攻之一山梁之間集衆萬餘
豈一堞軍之力所能禦哉卽軍足堞數尙勢分而
寡況今十不足一耶昔庚戌入衛軍三十餘枝計
十餘萬尙不能阻其不入今減去十之八止存二
萬餘見今衝處三四堞一軍緩處五六堞一軍而
自庚戌以來主兵雖練衛兵之費實爲不貲近自
元年以來新舊三標計軍六枝新造戰車八百餘
輛步軍六枝教之三年其精銳藝勇視衛兵不啻
什百矧衛軍工作勞苦馳驅道路而彼中復以秦

越相視人馬狼狽器技虛文未敢與主兵爭頡頏也亦何覲而難罷耶誠以邊長人少惟冀充數擺守而已或謂標兵旣增則宜掣夫標兵之增乃於各路調集操練卽是增來守邊之人於行伍之數未嘗增也又有謂老弱宜汰與班軍赤手不堪者夫薊之入衛邊兵二萬耳班軍每防不足三萬主兵五萬有奇通計之不足十萬至於運石裹糧守器收騎卽老弱亦不能棄無非數之不足其何以爲掣衛之計乎若以戰論在於較量敵情因而制變況宣大之虜犯止數百故將官恃家丁爲羽翼

遇小隊則角之有餘遇大舉輒束手坐視而薊虜之犯動以數萬計卽將爲孫吳豈能次次用寡而勝耶而今之責將者則欲人皆孫吳戰皆用寡仍欲其百戰而百勝夫何不計而所望之奢也至若以撤衛兵添土募爲節省又有大不然者蓋衛兵糧餉皆在彼中而薊止供行糧若募本土每名甲仗馬匹行糧約二十餘金作何區處且屢經殺擄生齒稀疏此不能募者一也往年銀五兩募兵一名尋以事故清勾其親族充之是五兩銀而得永遠軍故人爭避之此不能募者二也窮邊軍苦所

存十金之家無幾近日有司又將軍餘混拔充商
致累而逃處處空虛此不能募者三也每軍口糧
止一石而自賠草料養馬且支於二三里之外既
歸纔得其半而科費百端人之畏軍甚於出陣此
不能募者四也凡差委到邊人夫役使苛責杖刑
略無憐念什九瘡痍卽將領亦奴顏婢膝俛首無
氣此不能募者五也逃軍之在鄉者緝捕者固多
生事而捉獲者多被豪民打奪及關行有司又以
偏愛爲惠逃者公行無狀邊關莫敢誰何此不能
募者六也清勾之軍久無成憲十不得一而隨解

隨逃雖各省有清軍之官上司不以此爲責成本
官亦不以此而盡職此不能募者七也倘因必不
可足之軍而免其固守之責只以殺賊爲功則本
鎮見已練成三標與南兵幾二萬各路又練成主
客援兵三萬三標戰車步卒一萬五千各路練成
尖夜步軍一萬大約馬步七萬以上雖不能抵賊
數十萬若十萬以下必可犄角一戰卽將餘兵盡
汰亦可無奈本鎮外有屬夷住牧窺伺不常邊山
險夷相雜守塞有基恐固守之議竟不可捨則減
免入衛終屬不能惟有汰老弱清冒濫稽虛名一

節該督撫責成各道著實嚴行而其所節亦不多
本職之見如此仰祈酌議裁擇遵行

冬十月出塞燒荒

是月二十六日統三屯等營官軍於喜峯口出關
至地名惡谷聯營到黃崖等處督遣副將胡守仁
叅將史綱等分領精兵并夜不收兩哨且哨且行
或二三百里四五百里舉火將林木草野焚燬殆
盡使夷馬不得住牧而邊方易於守瞭也

十二月題禁給領胖襖科斂疏

竊惟臣子仰服天恩雖一縷之賜曷勝榮耀聖明

慎重惠典卽敝袴之微亦待有功且胖襖出自御庫下及行伍戍卒誠解衣之至惠挾纊之洪恩也夫何行久弊生乃將極曠之典遂爲侵斂之門每遇關領時襖之日各路另會小委官一員指稱打點費用科斂軍士集計不止數百餘金以致軍士有匱免科斂而不願領胖襖之謠甚至委官卽將胖襖就便京師侵賣及至領到之數又爲各邊委官先行揀出好襖每件索銀不等方與關領無銀者給與下等或私扣其餉必用一襖之值方得一襖到軍是朝廷以挾纊之恩而爲邊關壟斷之術

矣照得所屬沿邊關口守墩架礮夜不收官軍舊例三年一次關給胖襖袴鞋以禦冬月國恩甚優渥也訪得委官每於該領之人各索盤費銀一錢至於應給之日委官又不卽到且將衣鞋分爲三等索銀一錢五分者領上一錢者領中等五分者領下等是以國家曠典爲貪官奇貨也相應嚴禁以便軍情除革去常例外議別處盤費銀二三十金足爲入京使費其各路小委官盡經裁革仍通行禁約以絕科歛之弊以後凡遇關領胖襖歲期除臣委武官一員復會行巡撫委文官一員齎

本同去赴傾如有各路踵襲故弊仍前科斂盤費
及打點使費等弊卽便訪拏重究伏乞皇上俯憐
邊軍萬分艱苦蚤賜照數給發付與委官領運到
邊容臣會同巡撫親詣各路照今擬定實是傳烽
墩軍實是差入虜營尖哨實是架礮夜不收當官
唱名對手領著斷不使斂費分文事完請設香案
宣諭皇上曠蕩之恩卽令望闕謝恩俾知恩所自
出席邊軍感奮而矢心用命以禦虜矣
是月望日仲子安國生

隆慶五年辛未家嚴四十四歲

議修偏坡以固邊垣

牆垣爲邊圉之藩籬偏坡實牆垣之障蔽有偏坡則虜雖衆不敢仰窺於上馬雖強不得馳驟於下鉤竿不能到雲梯不能安遂度地利分難易酌定工力削爲懸崖如平漫難加剗削者或設柞木火器或挑壕塹品坑或添置高臺倍增雉堞務使與坡一體可恃

請設三武學疏

略云自嘉靖庚戌後西北匪茹屢侵幾旬一時杖鉞登壇之人卒鮮堂堂一戰摧輪而笞其背者皆

將帥之非人也夫兩京設有武學每三歲開科取士矣然因循故事竟乏真才於是不得已而求之世胄則統袴之子無復鷙闕之氣又不得已而拔諸奴虜行伍之間而韜鈴不諳終非統馭之才又不得已而舉之廢棄之隱逸然非粗悍難用則大言而寡實竟無以稱塞明詔仰舒拊牌之思者以儲之無素耳臣未暇遠及姑卽臣所督撫地方言之如遵化密雲永平三處舊有武廟武學而分隸衛所甚多合無將衛所官舍選其年力資性量置號房羣而養之仍分析門類各專一業一日韜略

如武經七書春秋左傳諸史百將傳等書一曰武藝弓弩刀槊矛盾戈鋌軍火神機之類一曰膽力倣古翹關負重之科力能引弓若干鈞弩若干石擗鼎若干斤以上方許入選一曰雜技如陰陽星_和遊說間諜火攻水戰陣圖戰法秘術奇技可裨軍機者此養將之大略也其行之科條則有五一曰防收養之濫凡所養士先將門子衛所幼官及應襲舍人每學百人爲率其民間須技力絕人資質厚重者間入之庶免濫觴之弊二曰裕養士之資夫武士占籍遠近不一若供贍不給則士習不

安宜照儒生例分三等稍優厚之一等月給米一石二等月給六斗三等月給行糧四斗五升其係職官支俸者止給行糧三日選合格之師夫章句之儒頗多迂腐介冑之夫亦鮮知兵宜多方咨訪精通韜略者數名破格用之充武學教授三年作士有績一體陞授四日專提督之秩密雲等鎮各有本管兵備就令監攝提督武學立之章程考其工課仍每歲一試以行賞罰定黜陟五日重錄用之典開科之年該道以所養之士考選應舉卽非科年其中才有可用者許該道呈於督撫因能任

事在督撫鎮巡間一調考果有奇才異能堪任將領者特薦以備將才之選且教且試要不出三年之外真才輩出所謂轉弱爲強以舒聖天子拊髀之思或者其在茲乎

秋八月臺功告成廕一子百戶賞銀三十兩紵絲二表裏

總督劉公應節爲增設重險以保萬世治安疏云昌薊二鎮自虜患以來議者獨重在守乃今敵臺之創衝者三五十步一座遠不過百步次衝者百步一座遠不過百五十步興工於隆慶三年之春

迄今凡厯五防制作久而彌精心思熟而愈巧高
堅宏麗迥出原議真有民間數百金不能辦者除
稍緩可通單馬步之賊者尙欠六十餘座其各路
要害可通大舉者今悉控扼無餘是役也咸謂益
於防守有十利焉軍以臺爲家內有薪水芻糧之
備外無風雨霜雪之侵一也多貯火器給用不乏
二也賊弓矢不能及枸杆不能施我之銃礮矢石
皆可遠擊三也軍依於臺身旣無恐膽力自壯卽
弱兵可兼而用之四也偏坡壕塹恃臺爲固五也
因臺得勢因勢制令節制可施六也卽有狡賊乘

馬踰險出吾不意而臺製高堅八面如一彼既不能仰攻而步賊又不敢深入七也相持可守又可待援兵八也賊謀入必謀其出來可拒阻歸可遊擊九也卽賊攻一臺潰一牆而虜馬不能擁入臺得肆力無患十也除隆慶三年修工已經具題外薊鎮西起石塘東至山海完臺八百十八座昌鎮東自黃花西至鎮邊完臺一百九十九座共一千一十七座而各臺緣牆砌建突兀參差鼎峙星羅足稱偉制其利無窮皆總理戚某才華並著謀斷相資相度山川則鳥道羊腸皆其陟降之地程護

工作則櫛風沐雨不辭經理之勞薊門練臺有約
督臺有官十二路樓堞相望居然虎豹之關築垣
有規塹坡有制二千里烽火相連允矣金湯之固
內保山陵之重人心有所恃以爲安外嚴夷夏之
防胡馬幾欲逞而復遁況在鎮已逾六防雖以勞
致疾而不遑惜功當首論宜覃殊恩而完臺獨多
尤宜破格優厚疏上部覆云戚某相視險阻厯羊
腸鳥道之艱督理工程甘櫛風沐雨之苦基址之
布置衝緩得宜修築之完堅形勢甚壯而經營綜
理之勞瘁訓練調度之精明北揚西畏尤當優獎

奏上以敵臺工完戚某廕一子百戶賞銀三十兩
紵絲二表裏夫臺工之舉縣官備發十萬緡而工
事畢其經費考工足當二十萬緡不惟固邊抑且
省費矣先時沿邊皆空牆圯壞雖有石砌小墩無
器械不能守禦自世廟十餘年來每歲終修飭徒
滋勞費而迄無成績家嚴乃創製立法東起山海
西抵石塘延袤二千餘里平滿處建高厚磚城陡
峻處建馬蹬鈎牆制與三屯城同又酌險夷衝緩
遠近不侔各創建崇臺編定號數多儲火器每臺
百總一人南兵五人臺正副各一人守望相助呼

應相間射打相應凡四五臺不等設一把總督之
或七八臺十臺不等設一千總率之監總烽候教
習火器遇敵卽督臺兵拒戰臨警復以平時照協
派定標路主兵班衛客兵各接臺之信地擺守攻
禦迄今虜之不能入犯內地者恃此耳

定臺軍

略云臺爲防邊要務且多木造貯火器於上風火
可慮奸細難防不可一日缺人近見守臺之軍兩
防之時雖議定每臺五十人而實少虛多縱苟且
充數年皆老弱撤防後每臺雖擬畱生兵十人將

官添撥家丁一人亦名有實無甚至一臺止一二
人者似此悞事非輕推求其弊只緣主軍不足數
差撥不常那東補西軍無定守臺無定軍且主兵
住居營城有父母妻子之戀往往棄臺回家勢必
不免今後著落路將嚴督本提將修完本路敵臺
于附近營城查減舊墩尖夜選擇精壯者每臺定
註十名各置腰牌年貌將官親押令軍隨身懸帶
以便點查仍用木牌一面總造年貌懸掛臺上令
其常時住守就中選精利一人專管臺門局鑰盤
詰面生之人不許窺伺及禁別臺之人不得混雜

以防細作仍於臺下空便之處除前蓋完房三間
外每臺再添數間各軍居住有家口者通移住此
其附近內外荒熟堪種地土儘其力量給牛種以
爲本業永不起科止造開種過數目類冊送道查
考一應雜差不可派撥候兩防之日再於客兵內
添撥足六十名兼管臺之兩空如此三年軍士皆
以臺爲家而守無不固矣

著哨守條約頒諭各臺官兵傳習守禦以防邊警
竊惟九邊地險莫薊鎮若薊之先務當急於守無
容諉矣但徒有守之之見而終昧守之之方議守

徒勤失事且數數耳故善守邊者惟謹烽火遠斥
堠而二事之舉否在九邊中惟薊鎮廢而不講可
勝歎哉今議守有六策恐其爲所襲也則遠入虜
營謂之明哨恐其爲賊哨截路也則遠伏虜地謂
之暗哨其傳烽火外也謂之架礮賊將到邊則賴
之其沿邊墩臺卽便應接烽火以便調度援兵是
烽火之當練也邊牆有新建空心臺分別衝緩計
壕授軍乘塞禦敵是臺守之當備也平時防守近
邊關寨每防撤兵之後尤當防屬夷之掩襲是關
寨之當嚴也所謂明哨者量齋食物直入虜營多

方誘伊大小虜衆覓其入犯之情於旬月之外我
得預爲調集兵馬或謂不可入虜營以防交通或
謂不可齎食物以傷國體此皆據跡而論未經事
之言耳尖哨出口遠者千里近者數百里徑行必
爲他夷所殺必須馬行伴領而去彼無利肯爲此
哉況尖哨必須馬行緩急之變晝夜兼程豈步涉
可至且中國馬不能騎出口外恐爲黃虜所識且
遵邊禁地騎坐夷馬仍以屬夷伴來謂之送哨彼
無利肯爲此哉尖哨入彼必待有消息而後返報
有住至三五月者一兩月者二三人豈能齎數月

之糧必是取食於夷彼無利肯爲此哉彼處打探
夷情恐夷酋欺詐又須詢之各部落子女及中國
虜人彼無利肯爲此哉若不附麗屬夷暗哨可往
何處敢近何夷之巢二人偶語對面莫聞潛在山
谷何由知虜情也此明哨必須厚餌當循定例以
裨實用夫明哨足矣何又復舉暗哨彼虜皆知我
明哨在巢恐於事急之時或羈絆之或殺害之絕
我臨時之報及每人犯前數日先遣哨虜將我哨
路攔絕屢至臨期無報必用暗伏尖夜架礮口外
瞭見虜馬南下星夜騰山鱗次傳礮相聞是暗哨

之所當急矣如大舉須待明哨報有聚兵消息遣之未晚舊有礮撥二項今全鎮邊牆無論深山窮谷立有傳烽墩瞭望聯絡又有空心敵臺蓄以軍火器具分布南兵守望無間今又擬用口外擺撥不用架礮名色且杜役占之弊也

第一路山海關關外屬遼東不入虜營

第二路石門寨

一片石大毛山二提調不係無賞並無入營明

哨義院口提調下尖哨入屬夷四處哨探磚難

大園城去邊四百五十里 董狐狸巢住哈喇兀素去邊三百七十里 兀魯思罕巢住兒女

親去邊四百里獐兔巢
住大醺場去邊二百里

第三路臺頭營

界嶺口青山口二提調下尖哨入屬夷二處哨

探耳只克巢住拖河兔去邊五百二十里董
魯思罕巢住哈喇兀素去邊三百七十里兀

獐兔巢住大醺場去邊二百里

第四路燕河營

桃林口提調下尖哨入屬夷二處哨探兀捏哱
會州去邊四百餘里哈哈赤老婆

耳只克巢住拖河兔去邊六百餘里

冷口提調下尖哨入屬夷二處哨探主仗兒巢
去邊四百里東炒盤

巢住老河去邊六百里

第五路太平寨

擦崖子提調下尖哨入屬夷六處哨探

長昂巢住正北

大圖去邊四百餘里

董忽力巢住東北哈喇

兀素去邊四百餘里

伯彥主喇巢住討軍兔

去邊三百三十里

哈孩巢住東北省祭去邊

二百五十里

伯彥時囉巢住西北虎人并儿

忽罵兒去邊三百餘里

東炒蠻巢

住東北老河等處去邊五百餘里

榆木嶺提調下不通撫賞不入夷營無明哨

第六路喜峯口

董家口提調下尖哨入屬夷四處哨探

長昂巢住正北

大隴去邊四百餘里

哈孩巢住正東省祭去

邊三百二十里

伯彥主喇幹撥禿等巢俱住

正北青城會州一帶去邊三百餘里

伯彥

時囉巢住正北虎父几忽罵兒去邊三百里

喜峯口守備下水關乃三衛屬夷人貢通衢但凡
差哨不論時期遇有東西夷人到關賞畢卽選差
伶俐尖夜跟同前去東西夷營一十三處哨探

東虜屬夷

虎禿罕哱囉歹討阿等父子三果俱
住東瓜梭一帶去邊五百五十里

脫孫李來巢住元魯班去邊三百七十里伯

彥哱囉巢住東北虎魯班那林去邊六百餘里

哈哈赤妻挨只克男抄蠻帖古主蘭台小把

都兒等母子巢俱住東北老河土魯指卜喇兔

一帶去邊五百七十里幹堆莽灰伯忽等三

夷巢俱住正北廠房老河一帶去邊六百餘里

撒因頭兒影克馬答哈哈板卜來哈喇等四夷

巢俱住正北火郎兒兒哈八哈喇几素捨喇哈

一帶去邊一千餘里

西虜屬夷

長昂巢住東北大圖去邊四百三十
里董忽力巢住正東哈喇几素去

邊三百六十里
父子三吏俱住
百餘里伯牙兒
俱住西北大興
李來巢俱住阿
打來阿牙台等
六百餘里
餘里

第七路松棚谷

龍井兒守備下
見等巢遇夏住
春冬時常住會
洪山口提調下
免等巢遇夏俱
春冬常住會州
羅文谷提調下
尖哨入屬夷二
處哨探伯彥主
刺鵝毛

戶去邊四
百餘里

第八路馬蘭谷

大安口提調下尖哨入屬夷二處哨探伯彥主刺巢住

會州去邊四百餘里 吾魯思罕巢住以避去邊五百餘里

寬佃谷提調下尖哨入屬夷二處哨探伯彥主刺巢住

會州去邊四百餘里 抄大巢住不墩去邊六百餘里

黃崖口提調下尖哨入屬夷二處哨探伯彥主刺巢住

會州去邊五百餘里 討日賴巢住不墩去邊六百餘里

將軍營提調下尖哨入屬夷二處哨探伯彥主刺巢住

會州去邊五百餘里 吾魯思反巢住以避去邊五百餘里

第九路牆子嶺

牆子嶺鎮虜營二提調下先年原有屬夷討賞設有尖哨入虜營明哨後虜由磨刀谷入犯革去撫賞至今並無入營明哨

第十路曹家寨

曹家寨提調下尖哨入虜夷一處哨探

他不能巢住刻

力哈當等處去邊
六百五十餘里

吉家庄提調係新分無明哨

第十一路古北口

古北口潮河川二提調下尖哨入屬夷二處哨

探大比只巢住無礙去邊三百五十里
挨台必巢住白搭川去邊二百餘里

第十二路石塘嶺

石塘嶺白馬關二提調下尖哨入屬夷一處哨

探伯彥打賴添差通事同入北虜辛愛安
攤營帳哨探營盤處所去邊七百餘里

以上哨探在石古曹則專重於西虜在石臺燕太則專重於東虜凡東西虜報不真者俱重治凡西報得東虜真情東報得西虜真情俱重賞其在喜峯東西虜報不真者俱重究松棚馬蘭哨報同

冬十月行邊有賦

木落山容改霜凝馬足遲歲華堪送酒世事只如

其險實羣猿狎斜陽倦鳥知邊愁頻入眼滄海愧
心期

額設守堠軍卒定編傳烽警報法

夫守邊之務瞭望爲先禦虜之機烽堠爲要薊鎮
向無傳烽法故虜竊犯而應援者必需徵調輒致
後期於是創立烽燧設專軍五名建房三間爲軍
棲止外砌火池四座豎旗竿六桿照協路傳烽制
爲號令載之條約播之詩歌使各軍熟習設專官
督之有警依協路放礮舉旗因旗以識路用礮以
分協夜則加火於旗上或兩烽交至亦設有不易

之規千里之遙瞬息可達不必徵調平時練定各營路馬步援兵卽知某協某路有事整兵肅隊奔赴刻期不移晷而數萬甲兵皆聚於牆下其戍卒之老弱者改撥別差選其年力精壯技藝便捷者俾守各臺演習旗火講明號令毫髮不差期於防禦有賴

附傳烽歌云一礮一旗山海路一礮二旗石門衝一礮三旗臺頭營一礮四旗燕河攻二礮一旗太軍路二礮二旗是喜峯二礮三旗松棚路二礮四旗馬蘭中三礮一旗牆子嶺三礮二旗曹家烽三

礮三旗古北口三礮四旗石塘衝千賊以上是大
舉百餘里外卽傳烽賊近牆加黑號帶夜晚添箇
大燈籠若是夜間旗不見火池照數代旗紅賊若
潰牆進口裏仍依百里號相同九百以下是零賊
止傳本協各成功單用礮聲分四路不用旗火混
忽忽山海大牆皆一礮石門喜曹二礮從臺頭松
古三礮定四礮燕馬石塘烽零賊東西一時犯兩
頭礮到一墩重該墩停礮分頭說東接西來西接
東但凡接礮聽上首礮後梆响接如風礮數梆聲
聽的確日旗夜火辨分明

增募南兵

南兵先已募足三千是年又請增募六千共約一萬之數編伍戍之於是數年以來薊事始有條理而乃部署主客兵於是定部位堅約束嚴旗鼓謹烽燧利器用裕芻糧齊步伐習技擊信賞罰一號令出戰則以車代城四面結勒步騎兵列於車下營外連以拒馬鎗鋒皆外面虜迫營車上火器先發於數百步外薄之近則轅下步兵排擊虜馬且戰且前虜卻乃出騎兵逐之然士必宿飽斯有餘力乃益輜重營以從有發則南兵當選鋒入衛兵

策應主兵戍守踐更者任轉輸其軍律則首分數
次刑名再次則技擊步伐偵邏嚮導批擣遮擊追
襲俘馘暨首功而止於是軍政日益張而邊防日
益備矣比年東西虜入犯偵者得戰守狀西西惴
惴寒心乃謝東胡款關入貢部議因謂虜數苦薊
北今修內備不戰而伐其謀卽軍政無所課功其
功則上上也乃請久畱薊勿他徙

議修守

略云薊昌二鎮節年修守臺牆壕塹器械官兵具
備且練有餘綽庶幾無遺策矣但邊長二千餘里

若一處失守則二千可恃之險皆爲長物今春防
臺工既畢固守可期而尙有可議者三事一曰臺
工宜補葢臺之設俱在衝處猶有衝緩之間不通
大舉而可通單馬者宜視空心臺稍減其制圍以
六丈高以三丈爲度上葢房數間深闊如臺不必
空心亦不用垛口傍開小門以便擊打一曰偏坡
宜深沿邊雖有偏坡然高下不齊斷續不一虛實
不同今定以深下三丈或二丈五尺爲率遇疏土
溜沙及連山硬石難以爲坡者從中截之各自爲
段另議以安柞木挑濬品坑或多設火器或增置

臺牆可恃爲險一日險僻宜備今邊關衝處備亦
密矣尙有素稱僻遠無臺無城如燕河之梧桐谷
界嶺之箭桿嶺等處雖深巖峭壁險處居多中間
豈無一二可通虜馬萬一狡虜出我不備則餘功
盡棄合將沿邊逐一閱視其應補臺若干座某處
舊有偏坡若干丈今應接濬若干丈某處舊坡不
可恃應剗剗若干丈某處難以削坡應別議於某
處某口的係險絕不必過備某處尙通虜馬該備
看明據實呈報以便次第興工庶臺垣隨處有備
而邊寨永保無虞矣

附錄辛未除夕賦懷二律

□捧徵書向薊邱
鹽車幾度嘆騅幽
蘭堪紉清
□□蕙苴□辭絕
塞愁忽訝光陰明
日改都將辛
□□□□胡索餉
今猶急聞說邊人
涕淚流
四歷迴杓障塞垣
顛毛如許怯簪冠
驚心歲月愁
仍在回首風塵夢
已闌百戰勞銷千
古□萬金散
盡幾人歡燕然北
望空彈劍馬草尋
常片石難

戚少保年譜耆編卷之九終